

Izjava Christiana Schwarz- Schillinga, visokog predstavnik za BiH na konferenciji za štampu u Mostaru

Hvala vam što ste došli.

Ono što ću upravo najaviti ne predstavlja mi zadovoljstvo, ali bezizlazna situacija u kojoj se ovaj grad našao ne ostavlja mi drugog izbora.

Ne predstavlja mi zadovoljstvo jer, otkako sam postao visoki predstavnik i specijalni predstavnik EU, težio sam tome da promoviram koncept odgovornosti, a ono što sam danas primoran uraditi protivno je tome.

Tokom moje posljednje posjete Mostaru 28. avgusta, jasno sam dao do znanja da ću, ukoliko gradski organi ne budu u stanju okončati imenovanja u državnu službu, postići dogovor u vezi sa javnim komunalnim preduzećima i riješiti pitanje HTV-a, intervenirati kako bi se stavila tačka na takvu neodrživu situaciju.

Ova pitanja sprečavaju ujedinjenje grada, budući da direktno utiču na sposobnost Gradskog vijeća da donosi odluke i da se bavi svojim redovnim poslom i rješava javna pitanja u interesu građana Mostara.

Da ne budem nepravedan prema Gradskom vijeću, ono jeste u međuvremenu okončalo imenovanja u državnu službu, i sada je na Agenciji za državnu službu Federacije BiH da oglasi upražnjena mjesta u okviru predviđenog roka.

Međutim, stranke nisu riješile status HTV-a, a nisam zadovoljan ni činjenicom da nisu našli rješenje za javna komunalna preduzeća.

Dvadesetosmog avgusta Gradskom vijeću sam dao mogućnost da ili riješi neriješena pitanja ili pak podnese zvanični zahtjev za arbitražu. Međutim, uprkos nekoliko pokušaja Gradskog vijeća da dođe do rješenja, takav zahtjev nije podnesen.

U trenutnoj atmosferi u ovom gradu, lako je upirati prstom. Ali svaki član Gradskog vijeća mora prihvatiti sopstvenu odgovornost za neuspjeh, a ja ne mogu dopustiti da ćorsokak u kome smo se našli odvede Mostar u još dublju krizu.

Stoga danas imenujem Norberta Wintersteina na funkciju specijalnog izaslanika za Mostar, u skladu sa *Odlukom visokog predstavnika o provođenju reorganizacije Grada Mostara*.

Mislim da vam je svima poznat gospodin Winterstein i njegovo iskustvo u Mostaru. On je, naravno, bio ključni član Administracije Evropske unije u Mostaru pod vođstvom Hansa Koschnika a kasnije je bio na čelu komisije koja je nosila njegovo ime i koja je pripremala teren za Statut Grada Mostara.

Specijalni izaslanik nema ulogu supervizora i nije zamjena za gradske vlasti, za gradonačelnika i Gradsko vijeće; ova tijela ostaju u potpunosti funkcionalna i odgovorna.

Specijalni izaslanik treba pronaći rješenja za HTV, kao i na ujedinjenju javnih komunalnih preduzeća, te da omogući da se poduzmu svi koraci koji su potrebni da bi se okončala imenovanja u državnu službi. Moguće je da će se baviti i drugim srodnim pitanjima.

On će pristupiti ovim zadacima u tri faze, prvo je tu da u bliskoj suradnji pruži svoje usluge kao medijatora i da zajedno sa strankama radi na iznalaženju rješenja. Drugo, strane još uvijek mogu zvanično tražiti od njega arbitražu

koja će biti konačna i obvezujuća.

Kao treće, u slučaju da politički dogovor o ovim pitanjima bude nemoguć u nekom razumnom roku, gosp. Winterstein može, u svojstvu specijalnog izaslanika, strankama predložiti sopstvena rješenja. Ukoliko ti prijedlozi ne budu prihvaćeni, ova pitanja će se vratiti meni na razmatranje.

Ovaj pristup dozvoljava maksimalan stepen vlasništva, ali još uvijek rezervira mogućnost za konačna rješenja kroz vanjsku intervenciju, ukoliko preuzimanje vlasništva ne uspije.

Gosp. Winterstein će u toku sljedeće dvije sedmice razmotriti situaciju, nakon čega će izraditi plan rada za period do kraja svog mandata. Njegov mandat će trajati tri mjeseca do kraja ove godine, i neće se produžavati.

Mostar je važan – najviše je važan ljudima koji u njemu žive, ali važan je i ostalima drugdje u Bosni i Hercegovini, a istovremeno je on moćan simbol koji je važan i van granica ove zemlje.

Štaviše, Upravni odbor Vijeća za provedbu mira na svom posljednjem sastanku konkretno je tražio od mene da poduzmem odlučne mjere, ukoliko se one pokažu neophodnim, kako bi se proces ujedinjenja nastavio.

Ovo je grad koji *može* biti uspješan; *može* opet postati energično i šaroliko urbano središte. Mjere koje sam upravo naveo pomoći će da to zaista postane stvarnost.

Mislim da je sve jasno, ali biće mi drago da odgovorim na dodatna pitanja ako ih imate, kao i gosp. Winterstein.

Hvala.